

ACTA DA SESIÓN EXTRAORDINARIA CELEBRADA POLA COMISIÓN INFORMATIVA PERMANENTE DE ECONOMÍA E FACENDA E ESPECIAL DE CONTAS, O DÍA 26 DE AGOSTO DE 2013 ÁS 13.30 HORAS.

Sendo as trece horas e trinta minutos (13:30) do día 26 de agosto de 2013, reúnese en sesión extraordinaria convocada ao efecto a Comisión Informativa Permanente de Economía e Facenda e Especial de Contas, coa asistencia das/os concelleiras /os que de seguido se indican.

Concelleiras/os asistentes:

Vocais:

Grupo municipal popular

Alfredo Taboada Alvelo

Grupo municipal socialista

José Manuel Miñones Conde

Francisco Villaverde Marcos

Concelleiras/os non adscritas/os

Manuel J. Ferreiro Santiago

Alfonso Rey López

María González Gómez

Ramón García Argibay

Mª Dolores Fernández Álvarez

Emilio Martínez Carballeira

Presidente: Don Santiago V. Amor Barreiro

Secretaria: Dona Rosa Ana Prada Queipo.

Asiste o señor **interventor** don José Antonio Rueda de Valenzuela

ORDE DO DÍA:

Punto único.- Exame e informe Conta Xeral 2012.

O señor alcalde don **Santiago V. Amor Barreiro** cede a palabra ao señor interventor don **José Antonio Rueda de Valenzuela**, que lembra o indicado no informe de intervención ao respecto do carácter técnico do expediente da conta xeral, que reflicte contablemente unha xestión, debendo ser avaliado por tanto desde aquel punto de vista.

Polo grupo municipal socialista intervéñen don **José Manuel Miñones Conde** para dicir substancialmente que na páxina 4 do informe de intervención, tras examinar o anexo 9 do informe 413, hai algunha cuestión que non lle quedou clara, por exemplo onde di que a cifra do remanente cambiaría de signo en caso de considerar tamén os gastos rexistrados na conta 413, respondendo o señor **interventor** que a conta 413 reflicte facturas que ao remate do ano non foran aprobadas, gastos que sen embargo o remanente de tesouraría non ten en conta, ao considerar unicamente fondos líquidos, dereitos e obrigas, producíndose a circunstancia de que a contabilidade financeira si as recolle no balance pero non a orzamentaria no remanente de tesouraría.

Continúa o señor **interventor** expoñendo que o saldo da conta 413 debe ser examinado con detalle, porque unha cousa é que as facturas non se aprobaran

porque non había respaldo orzamentario para aprobalas e outra distinta é que non foran aprobadas porque aínda non están conformadas, xa que houbo empresas que presentaron facturas, por exemplo, a día 27 de decembro.

Interésase o señor **Miñones** por se anteriormente as facturas pendentes non se incluían no remanente de tesouraría, contestando o señor **interventor** que non se incluiron nunca, preguntando o señor **Miñones** se no anexo 5, no remanente de tesouraría, as partidas que aparecen pendentes de cobro veñen a ser destas, respondendo o señor **interventor** que non serían en ningún caso, xa que o anexo 413 non ten reflexo no orzamento.

Continúa dicindo o señor **Miñones** que non entende a razón de que agora se quite o anexo 413 da contabilidade, contestando o señor **interventor** que non é que se quite, xa que está, pero que a contabilidade das entidades locais é similar á das empresas privadas (balance e conta de resultados), pero que a normativa non considera os gastos incluídos naquela conta como parte da vertente orzamentaria, polo que o remanente de tesouraría, que é unha consecuencia desa contabilidade orzamentaria, non os inclúe.

Porén a conta 413 si afecta á estabilidade orzamentaria, como reflicte o informe de estabilidade, que contempla determinados axustes, como consecuencia do limitado da contabilidade orzamentaria. Remata dicindo que o tratamento foi igual todos os anos, por ser o previsto legalmente.

O señor **Miñones** interésase por se nos 8.500.000 de euros que figuran como dereitos pendentes de cobramento no remanente de tesouraría están incluídos os cobros do lixo, contestando o señor **interventor** que si, pero que só se consideran dereitos recoñecidos as liquidacións notificadas, contía moi inferior, e que o resto do ingresos serán liquidados no exercicio 2013.

Pregunta o señor **Miñones** se se especifica a cantidade pendente de cobro do lixo, contestando o señor **interventor** que non, que non é algo que deba contabilizarse de xeito diferenciado, pero que o comprobará e facilitará esa información aos membros da Comisión. Di que na contabilidade figuran dereitos de exercicios anteriores, como o 93 ou 94, derivado de que ate o de agora nunca se fixera unha purga de dereitos de exercicios pechados, que pola súa antigüidade en moitos casos non resultará posible cobrar, que tales dereitos non teñen efecto sobre o remanente de tesouraría, grazas á previsión de dereitos de dubidoso cobro.

Se interesa o señor **Miñones** por se no caso de que se tivese en conta o importe da conta 413 o remanente sería negativo e se é iso o que quere dicir o informe de intervención con que a contabilidade podería cambiar de signo, ante o cal o señor **interventor** da lectura ao parágrafo do informe, engadindo que se ben isto é así, debe considerarse que parte daqueles gastos están abonados, tendo por tanto reflexo indirecto no remanente de tesouraría.

Continúa preguntando o señor **Miñones** onde está exactamente contabilizada a regulación da taxa do lixo, respondendo o señor **interventor** que no concepto correspondente do Capítulo 3 “Taxas e outros ingresos”, reiterando que lles remitirá a todos os membros da comisión esa información.

Indica o señor **Miñones** que en relación á regularización do proceso con Espina &

Delfín xa o ano anterior se falara de que estaba pendente, que o seu grupo o pedira por escrito e se lles contestara que seguía pendente, ao que o señor **interventor** responde que tal e como estivo o traballo do departamento ate o de agora non foi posible abordar ese tema porque retrasaría o peche contable de anos anteriores, que este ano é a primeira vez en moito tempo en que existe un período entre o peche da contabilidade do ano anterior e o remate do exercicio, e que se encargará deste traballo xunto coa xefa de contabilidade o antes posible.

Ante a pregunta do señor **Miñones** sobre se non se tería que facer antes de que finalice o contrato, responde o señor **interventor** que non é imprescindible porque Espina & Delfín non desaparece, e que esa regularización é debida a que durante moitos anos Espina & Delfín non cobraba ao Concello os traballos que efectuaba, pero tampouco ingresase o recadado pola taxa do lixo, dando lugar a un problema contable considerable, e que moitas facturas a examinar remóntanse a hai máis de dez anos.

Finalmente o señor **interventor** indica que mañá mesmo fará chegar a información antes solicitada polo señor **Miñones**, o cal reitera que lles interesa sobre todo a información relativa á cantidade de 8.500.000 euros, xa que ao examinar o anexo non acaban de ver claro o que corresponde a cada parte, e, sobre todo, o correspondente ao cobro retroactivo da taxa do lixo.

Tras un breve cambio de impresións o asunto é ditaminado favorablemente cos votos a favor dos 2 membros do grupo municipal popular e a abstención do resto dos membros da comisión informativa.

E non habendo mais asuntos de que tratar o señor presidente da por rematada a sesión ás trece horas e corenta e cinco minutos do día de referencia de todo o que eu como secretaria certifico.